



Em Hombes in die Fliß gelaaf

Gibt's das heit aach noch, Schdeenschdumbe?

Heit moi'n lees ich in de Zeidung, dass e' Fraa aus Hahnebach (es Ertche leit bei Kirn) „neunfache Weltmeisterin“ worr wär. „Ei de Dunnerkeil!“ dacht ich, do is jo e'Speerwurf-Weltmeeschderin e' Klacks degesje! Nein mol e'Weltmeeschdertitel! So ebbes gibt's nor dort owwe im Kirner Land. De Professor Berno Wichmann domols (unser Herrgott meeche geere honn!), der is bis hoch in sei Alder Weltmeeschder gewees. Bis no Japan iss'er gefloos ums zewerfe. Im Diskuswerfe, im Schbeerwerfe, es hodden keener iwwertroff. Mei alde Vadder (ehemolicher Weltklasseathlet) saat domols, er wa weit iwwer 80 Jahr: „Wenn ich heit e'Kul in di Hand nemme, un losse das Ding aus'em Ring falle, dann bin ich Deutscher Meeschder in meiner Aldersklass. E'annere finnt sich nit, der so ebbes noch macht.“ Do denk ich aan mei junge Johre, als in Kallefels (es Ertche leit vor

Hahnebach) e' Kreissportfest vumm Turnverband aangesaat wa. De Vadder un ich sinn hiingefahr. Was fore Leewe uff dere Wiss! Gewiwwelt un gewawwelt hot's. Do sinn di domols schunn alde Leichtathlede angetreet zum Dreikampf. Aus em Schdand hupse, Schleuderballwerfe un 50 Meeder dorch di Wiss laafe. Was fore Renne! Jeder hatt deno gewunnun, hot e'Eichgranz uff sei Werrsching kriid. Bei de Turnbriider wa das Usus. Nor een Disziplin hot's domols noch gebb, di honn ich deno ni mehr gesihn: Schdeenschdumbe! De Willi Schwindt, so hot de Kreisturnwart domols gehees, riift: „Alles aantreede zum Schdeenschdumbe; ganz hinne uffem Platz.“ Den Satz werr ich nit ve'gesse. Dann kame'se, di Athlede vun domols, Kerl wi Bärel!Vorneweg es Gräfe



Rudolf
Hornberger
macht sich so
seine Gedanken

Henner un sei Bruder, aus Ordernum ware'se aange-reist. Vor dene konnt merr Ängscht kriin, so viil Kraft hadde di unnerm Unnerhemd. Kee annere Turner hot di zwee gepackt, un de „Siich“ honn di unner sich ausgemacht. Ja un do draan, aan das längscht ve'gesse Turnfeschtche im Hahnebachdaal, hot mich der Bericht im Effentliche widder erinnert. Heit bin

ich aach e'alder Mann un kennt de Schdeen vun iwwer 20 Pund, ve'leicht noch heewe, kennt'en aach noch iwwer de Balke falle losse, doch Weltmeeschder werre, das kennt ich beschdimmt nit. Drum gradeliir ich dere Fraa Gitta Jung aus Hahnebach, dass di mit 70 Jahr noch so schbortliche Iiwunge vollfihre kann un debei Weltmeeschderin werdd. Uff meiner neegscht Modorradtur werr iche'mol gugge komme, wi das alles vor sich geht.